

CONVENIO ENTRE A FEDERACIÓN GALEGA DE MUNICIPIOS E PROVINCIAS E O FONDO GALEGO DE COOPERACIÓN E SOLIDARIEDADE

ANO 2024

En Santiago de Compostela, a 27 de maio de 2024

REUNIDOS

Dunha banda, D. Alberto Varela Paz, con DNI 35.461.107-Y, alcalde do Concello de Vilagarcía de Arousa e Presidente da Federación Galega de Municipios e Provincias, en diante FEGAMP, cargo que exerce na actualidade en nome e representación da mencionada entidade

E doutra, Juan Antonio González Pérez, con DNI 76987132Z, Alcalde do Concello de Nigrán e Presidente do Fondo Galego de Cooperación e Solidariedade, en diante Fondo Galego, cargo que exerce na actualidade en nome e representación da mencionada entidade.

Interveñen, ambas partes, na respectiva representación que ostentan e recoñecéndose plena capacidade legal e lexitimación para subscribir o presente Convenio.

EXPOÑEN

Primeiro. A Federación Galega de Municipios e Provincias, Asociación constituída pola totalidade das entidades locais de Galicia (313 concellos e 4 deputacións provinciais), goza de personalidade xurídica, e conforme o disposto no artigo 8 dos seus Estatutos, aprobados na Asemblea ordinaria de data 4 de decembro de 2003, gozará de plena capacidade para subscribir convenios.

Entre os seus fins, recollidos nos seus estatutos, atópanse os seguintes:

- a) Fomentar e defender a autonomía das entidades locais.
- b) Promover, representar e defender os intereses das entidades locais ante outras administracións públicas.
- c) A promoción e o desenvolvemento da cultura e lingua galega no ámbito local.
- d) Promover e reivindicar ante os correspondentes poderes públicos canto estime oportuno na orde a lograr o teito competencial das respectivas entidades locais.
- e) Fomentar a participación cidadá na vida local.

- f) O desenvolvemento e a consolidación do espírito europeo no ámbito local baseado na autonomía e a solidariedade entre os entes locais.
- g) A defensa en xuízo dos intereses da Administración local galega, se é o caso, así como as actuacións necesarias perante o Tribunal Constitucional, de acordo coa súa lei orgánica, en defensa da autonomía local.
- h) Calquera outro que afecte ou incida de forma directa ou indirecta aos seus asociados ou á propia Federación.

Conforme o disposto no art. 8 dos seus Estatutos a Fegamp gozará de capacidade para subscribir convenios, e o seu artigo 46, parágrafo 1, letra b), atribúen ao seu Presidente a facultade de representación da mesma.

Segundo. O Fondo Galego de Cooperación e Solidariedade, de conformidade cos seus Estatutos, é unha asociación sen ánimo de lucro, con personalidade xurídica propia e independente e con plena capacidade xurídica e de obrar. Actualmente agrupa a 111 administracións locais, 108 concellos e 3 deputacións, conformándose como a rede sectorial máis numerosa do municipalismo galego.

Segundo o artigo 15 dos seus Estatutos a súa Comisión Executiva exercerá, entre outras, a atribución de formalizar os oportunos contratos, convenios e demais actos necesarios para a actividade do Fondo Galego de Solidariedade.

Pola súa banda, o art. 22.1 sinala que a persoa que ostenta a Presidencia da Comisión Executiva representa a asociación perante todos os organismos.

Entre os seus fins, recollidos nos seus estatutos, atópanse os seguintes:

- a. Contribuír, desde as administracións locais galegas, ao desenvolvemento dos países e comunidades empobrecidas para promover cambios positivos e sostibles nas condicións de vida que contribúan á plena realización dos Dereitos Humanos Universais.
- b. Promover unhas administracións locais e unha cidadanía galega sensibilizadas, concienciadas e comprometidas coas políticas e accións de cooperación ao desenvolvemento, co obxecto de favorecer unha maior comprensión da realidade dos países empobrecidos, da necesidade dun compromiso ético na loita contra as desigualdades e a prol dunha maior equidade a nivel global.
- c. Promover e posibilitar que todas as administracións locais galegas poidan impulsar e/ou ser partícipes de accións e políticas de cooperación ao desenvolvemento, potenciando a coordinación das mesmas.

- d. Defender, reivindicar e visibilizar a cooperación ao desenvolvemento, especialmente a impulsada polas administracións locais galegas, ante todo tipo de organismos e institucións.
- e. Procurar que progresivamente as administracións locais galegas que formalicen o seu compromiso con políticas de cooperación ao desenvolvemento incrementen os seus respectivos orzamentos para este fin.
- f. Promover programas de voluntariado nacionais e/ou internacionais co obxecto de contribuír á solidariedade entre os pobos.
- g. Calquera outro obxectivo de similar natureza que non sexa contrario á normativa legal vixente en cada momento.

Terceiro. Que os Estados membros da ONU adoptaron a finais de 2015 os Obxectivos de Desenvolvemento Sostible co fin de erradicar a pobreza, protexer o planeta e asegurar a prosperidade para todas as persoas nun prazo de quince anos, de aí que tamén se lles coñeza como Axenda 2030. Os ODS incorporan metas relativas á loita contra a fame, o acceso á saúde e a educación, a igualdade de xénero ou o coidado do planeta. Todas elas inclúen indicadores que entroncan coas competencias locais, de aí que as administracións locais teñan un papel chave na súa consecución. Deste xeito, as administracións locais poden e deben tomar medidas para acadar os ODS na súa contorna, aliñando as súas políticas coa Axenda 2030, e tamén poden contribuír á súa consecución nos lugares máis desfavorecidos a través da cooperación internacional.

Cuarto. Que a Lei de Cooperación para o Desenvolvemento Sostible e a Solidariedade Global, aprobada na pasada anualidade 2023, fortalece e recoñece o papel da cooperación descentralizada e, dentro desta, da cooperación municipalista. Os Fondos de Cooperación aparecen mencionados como actores clave para a coordinación e impulso da cooperación ao desenvolvemento realizada desde o ámbito local. Dita Lei tamén esixe un compromiso maior por parte de todas as administracións do Estado en materia de cooperación ao desenvolvemento para o cumprimento dos Obxectivos do Desenvolvemento Sostible a nivel global.

Quinto. Que durante os seus 27 anos de andaina, o Fondo Galego tense consolidado como unha ferramenta da administración local galega non só para a execución de proxectos de cooperación internacional nos países do Sur Global, senón tamén para impulsar múltiples actividades de sensibilización en Galicia que incorporan á axenda local a defensa e promoción dos Dereitos Humanos, así como a Axenda 2030.

Sexto. Que ambas partes reafirman a idoneidade e valor cualitativo do espazo local como eido para fomentar a conciencia e o compromiso cívico coa erradicación da pobreza e o fomento da igualdade e a xustiza social a nivel global.

Por todo o anteriormente exposto, ambas partes acordan subscribir o presente Convenio de colaboración que se rexerá polas seguintes

CLÁUSULAS

PRIMEIRA. Obxecto do convenio.

O presente convenio ten por obxecto establecer as condicións palas que se rexerá a colaboración entre a Federación Galega de Municipios e Provincias e o Fondo Galego de Cooperación e Solidariedade no proxecto denominado "As Elixidas".

O proxecto ten como obxectivo promover a implicación dos concellos e deputacións galegas no cumprimento do ODS 5 da Axenda 2030 para o Desenvolvemento Sustentable das Nacións Unidas: "Lograr a igualdade entre os xéneros e empoderar a todas as mulleres e nenas". E, concretamente, na meta 5.5 "asegurar a participación plena e efectiva das mulleres e a igualdade de oportunidades de liderado a todos os niveis decisorios na vida política, económica e pública".

Para iso, preséntase un plan de acción que abrangue a mulleres electas de Galicia do eido municipal, así como doutros países do Sur cos que o Fondo Galego mantén unha relación de cooperación, como Mozambique e Cabo Verde.

SEGUNDA. Descrición do convenio.

O Fondo Galego de Cooperación e Solidariedade, en colaboración coa FEGAMP, fomentará o intercambio de ideas e experiencias entre municipios Galegos e de países do Sur Global para mellorar a Gobernanza Local e incorporar o enfoque de xénero na democracia local. Neste sentido, celebrarase un encontro internacional de mulleres electas seguindo o seu compromiso coa Axenda 2030 e en especial coa meta 5.5. O encontro terá lugar durante o segundo semestre do ano na cidade da Coruña.

A participación e o liderado equitativos de xénero na vida política e pública son esenciais para lograr os ODS da Axenda 2030 (especialmente o ODS 5). Con todo, os datos a nivel global mostran que as mulleres teñen un baixo grao de representación en todos os ámbitos de toma de decisións na esfera mundial de xeito que estamos lonxe de lograr a paridade de xénero na vida política.

TERCEIRA. Obrigas.

O Fondo Galega deberá:

1. Executar o proxecto referido na cláusula primeira.
2. Aportar 7.061,26 € para a execución do proxecto.
3. Destinar os fondos percibidos para financiar esa actuación.
4. Consentir expresamente a publicación da axuda concedida no Diario Oficial de Galicia, na páxina web oficial e nos rexistros públicos, consonte co establecido no artigo 15 da Lei 1/2016, do 18 de xaneiro, de transparencia e bo goberno.
5. De acordo co disposto na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, o Fondo Galega comprométese a dar axeitada publicidade do carácter público do financiamento das actuacións obxecto do convenio, ao cumprimento de todas as condicións e abrigas recollidas neste convenio, e ao sometemento ás actuacións de supervisión e control previstas no mesmo, así como as xerais derivadas da aplicación da normativa de axudas e subvencións.
6. Prestar a colaboración e facilitar canta documentación lle sexa requirida no exercicio das funcións de control que lle corresponden á FEGAMP.
7. Conservar todos os comprobantes de gasto durante un período de 4 anos, coa excepción dos casos suficientemente xustificados e autorizados pola FEGAMP.
8. Xustificar, mediante declaración asinada e previamente ao cobro de calquera dos pagos da subvención, estar ao corrente no cumprimento das abrigas tributarias e fronte á Seguridade Social española e non ter pendente de pagamento ningunha outra débeda coa Administración pública da Comunidade Autónoma de Galicia, nin ser debedor por resolución de procedencia de reintegro.
9. Velar porque tanto os restantes partícipes como a cidadanía con ela relacionada teñan coñecemento do financiamento desembolsado pola Xunta de Galicia e do apoio desta á acción.
10. Solicitar autorización previa e expresa para calquera modificación substancial do proxecto, entendendo por tal aquela que afecte aos seus obxectivos, resultados, persoas beneficiarias, lugar e

prazo de execución ou xustificación. As solicitudes de modificacións substanciais do convenio deberán estar suficientemente motivadas e ser formuladas por escrito dirixido ao Secretario Xeral da FEGAMP, que resolverá e notificará no prazo dun mes sobre a súa autorización ou denegación.

A FEGAMP deberá:

1. Achegar a axuda establecida na cláusula cuarta.
2. Colaborar na difusión do evento entre todas as administracións locais de Galicia.
3. Animar á participación das alcaldesas que hai en Galicia.

CUARTA. Compromiso económico, obrigas e sistema de abono.

A FEGAMP, do custo total do proxecto que se estima en cincuenta e un mil cincocentos corenta e dous euros (51.542,00 €), aboará ao Fondo Galego a contía máxima de 2.500,00 €.

O Fondo Galego poderá recorrer a terceiras fontes ou a diversos patrocinadores externos, pero en calquera caso todo incremento nos custos de execución será a risco e ventura da entidade.

A subscrición do presente convenio non implicará relación laboral, ou de calquera outra natureza, entre as persoas ou profesionais que desenvolvan as accións que constitúen o obxecto deste convenio coa FEGAMP, de tal maneira que por este concepto non se poderá esixir responsabilidade algunha, nin directa nin subsidiaria.

Tras a sinatura do presente convenio e previa petición do Fondo Galego, a FEGAMP, tendo en conta o carácter sen ánimo de lucro da entidade e a non dispoñibilidade doutras fontes de financiamento que permitan iniciar as actividades, concederá un anticipo pola contía máxima da subvención concedida, para afrontar os pagos inmediatos que conleve a execución deste proxecto.

Coa solicitude do anticipo deberá presentar:

1. Declaración do conxunto das axudas recibidas doutras entidades públicas ou privadas para o mesmo fin.
2. Declaración de estar ao corrente no cumprimento das obrigas tributarias e fronte á Seguridade Social española e non ter pendente de pago

ningunha outra débeda coa Administración pública da Comunidade Autónoma de Galicia, nin ser debedora por resolución de procedencia de reintegro de acordo co establecido no artigo 10.3 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

QUINTA. Xustificación do proxecto.

A xustificación da execución do proxecto efectuarase por parte do Fondo Galega nun prazo máximo de tres meses, a contar desde a finalización das actividades programadas, de conformidade co establecido no artigo 94.3 d) da Lei 10/2021, do 9 de marzo, reguladora da acción exterior e da cooperación para o desenvolvemento de Galicia, e con data límite do 31 de marzo de 2025.

A xustificación final da realización das actividades subvencionadas e da consecución dos obxectivos previstos revestirá a modalidade de conta xustificativa con entrega de xustificantes de gasto, de conformidade co establecido nos artigos 28 da Lei 9/2007 e 48 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

A entidade beneficiaria deberá presentar un informe que constará de dúas partes:

1ª parte: xustificación técnica, que incluírá:

- Un informe final sobre os obxectivos, as actividades realizadas e os resultados obtidos.
- Certificación acreditativa do cumprimento da finalidade para a que foi concedida a subvención e da aplicación dos fondos á finalidade destinada, expedida polo órgano competente do Fondo Galega.

2ª parte: xustificación económica, que incluírá:

- Certificación de gastos do proxecto por partidas orzamentarias e na que se indique as distintas fontes de financiamento, expedida polo órgano competente do Fondo Galego.
- Declaración do conxunto das axudas recibidas doutras entidades públicas ou privadas para o mesmo fin, de acordo co establecido nos artigos 11 letra d) da citada Lei 9/2007 e 22 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

- Relación de todos os gastos efectuados con identificación da data, número da factura ou do documento xustificativo, identificación do emisor das mesmas, descrición do gasto, importe en euros e a data e forma de pago dos mesmos.
- Facturas ou outros documentos xustificativos de valor probatorio equivalente no tráfico xurídico mercantil ou con eficacia administrativa incorporados na relación a que se fai referencia no apartado anterior.

Os fondos faranse chegar por transferencia bancaria á conta corrente que o Fondo Galego indique, mediante a presentación da certificación na que conste a súa titularidade, non asumindo a FEGAMP os gastos bancarios que se derivasen desta actuación.

A alteración das condicións tidas en conta para a concesión das subvencións, e, en todo caso, a obtención concorrente de axudas outorgadas por outras administracións, entes públicos ou privados, poderá dar lugar á modificación da resolución de concesión.

Esta subvención será compatible con calquera outra procedente doutras administracións públicas ou entes públicos ou privados para a mesma finalidade, sempre que o importe total das mesmas non supere o custo total do proxecto subvencionado.

Os rendementos financeiros que fosen xerados polos fondos librados aos beneficiarios incrementarán o importe da subvención concedida e aplicaranse igualmente ás actividades subvencionadas.

Os gastos acreditaranse mediante facturas e demais documentos de valor probatorio equivalente no tráfico xurídico mercantil ou con eficacia administrativa.

Con carácter excepcional, nos supostos debidamente xustificados e motivados poderase aceptar a xustificación do pago en efectivo para importes inferiores a 1.000 €, acompañando xustificante do cobro do provedor, conforme establece o artigo 42.3 do Decreto 11/2009, do 8 de xaneiro, polo que se aproba o Regulamento da Lei 9/2007, de subvencións de Galicia. Para gastos iguais ou superiores a 1.000 € non poderán aceptarse pagos en efectivo, nin a través de cheque.

SEXTA. Causas de invalidez da resolución de concesión e reintegro.

O presente convenio resolverase:

- a) Por incumprimento total ou parcial dalgunha das estipulacións que o regulan.
- b) Pola aplicación dos fondos para fins distintos dos que motivaron a súa concesión.
- c) Polo transcurso do tempo fixado sen que se execute o investimento obxecto da subvención.
- d) Pola desestimación dalgunha das partes.

De resolverse o convenio, a FEGAMP poderá, no seu caso, esixir o reintegro das cantidades achegadas. Igualmente, de conformidade co disposto no artigo 17.3 da Lei 9/2007, do 13 de xuño, procederá o reintegro do exceso percibido no suposto de que o importe da axuda, illada ou en concorrencia con outras subvencións, axudas, ingresos ou recursos, supere o custo da actividade subvencionada.

SÉPTIMA. Publicidade.

O Fondo Galego obrígase a incorporar de forma visible en todas as accións derivadas da actividade subvencionada (placas, letreiros, carteis, publicacións, material de difusión, publicidade e outros medios análogos) o logotipo oficial da FEGAMP, todo iso en formato duradeiro e material resistente para a debida difusión da orixe da subvención. Cando a organización financiada exhiba o seu propio logotipo, o da FEGAMP deberá figurar co mesmo tamaño e con iguais condicións de seguridade.

OITAVA. Vixencia e extinción.

O presente convenio entrará en vigor ao día seguinte da súa sinatura e manterá a súa vixencia ata o 31 de decembro de 2024. Sen prexuízo do anterior, poderanse incluír as actuacións iniciadas desde o mes de xaneiro de 2024, conforme ao establecido nos artigos 2, apartado 1.b), da Lei 9/2007, do 13 de xuño, de subvencións de Galicia e 2.2.b do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

NOVENA. Avaliación, seguimento e interpretación.

Para facilitar o seguimento e cumprimento do convenio, constituirase unha Comisión Mixta, integrada por un representante da FEGAMP e un representante do Fondo Galego.

A Comisión Mixta ditará a súas propias normas de funcionamento, debéndose reunir cando o solicite algunha das partes.

As súas funcións serán:

- Interpretación do convenio.
- Intervención previa á resolución por incumprimento.
- Calquera outra relacionada co desenvolvemento do presente convenio.

DÉCIMA. Protección de datos.

Os datos persoais recadados neste procedemento serán tratados, na súa condición de responsable, polo Fondo Galego, coa finalidade de xestionar a tramitación da axuda. As bases xurídicas do tratamento son o cumprimento de obriga legal derivada da normativa de subvencións, a obriga contractual contraída coa entidade solicitante e o interese lexítimo do Fondo Galego. Os datos persoais poderán ser facilitados a terceiras entidades en función dos fins descritos, en particular ás autoridades tributarias e laborais, e á consellería competente en materia de economía e facenda. Os datos conservaranse polo período legal esixido polas normativas laboral, fiscal e civil. Ten dereito de acceso, rectificación, supresión dos seus datos, e a portabilidade, limitación ou oposición, enviando un escrito ao FONDO GALEGO DE COOPERACIÓN E SOLIDARIEDADE, Rúa Varsovia, 4C - 6º andar (Área Central), CP 15703, Santiago de Compostela (A Coruña). A autoridade de control competente é a Axencia Española de Protección de Datos.

DÉCIMO PRIMEIRA. Modificación do convenio.

O presente convenio poderá ser modificado por mutuo acordo das partes a través da subscrición da correspondente addenda modificativa, que deberá ser subscrita polas mesmas autoridades que asinan este convenio.

DÉCIMO SEGUNDA. Natureza xurídica.

O presente convenio rexerese polo disposto na Lei 10/2021, do 9 de marzo, reguladora da acción exterior e da cooperación para o desenvolvemento de Galicia, no Decreto 29/2017, do 9 de marzo, de cooperación para o desenvolvemento, na Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia e demais normativa que sexa de aplicación.

En proba de conformidade é asinado, por duplicado, en Santiago de Compostela, a 27 de maio de 2024.

Alberto Varela Paz
Alcalde de Vilagarcía de Arousa
Presidente da FEGAMP

Juan Antonio González Pérez
Alcalde de Nigrán
Presidente do Fondo Galego